

Rumah mewah jadi makmal proses dadah

FOTO INTAN NUR ELLIANA ZAKARIA/BH



Shamsul Amar (dua dari kanan) menunjukkan hasil rampasan pembongkaran makmal memproses syabu di sekitar Klang, pada sidang media di Ibu Pejabat Polis Daerah Klang Selatan, semalam.

Rumah mewah jadi makmal proses dadah

➔ Polis tahan lima suspek dalam serbuan di tiga lokasi, rampas peralatan RM110,000

Oleh Norzamira Che Noh
bhnews@bh.com.my

Klang

Sekumpulan empat lelaki dan seorang wanita dipercayai menjadikan kawasan sunyi dan belum diduduki sepenuhnya di Bandar Botanic di sini, sebagai makmal memproses dadah jenis syabu dengan menyewa sebuah rumah teres mewah tiga tingkat.

Ketua Polis Daerah Klang Selatan Asisten Komisio-ner Shamsul Amar Ramli, berkata kegiatan jenayah kumpulan itu terbongkar selepas polis menahan suspek dalam tiga serbuan yang seterusnya membawa kepada penemuan makmal memproses dadah itu.

Dalam serbuan pada

Khamis lalu, sepasukan anggota dan pegawai dari Bahagian Siasatan Jenayah Narkotik Ibu Pejabat Polis Daerah (IPD) Klang Selatan menyerbu tiga lokasi iaitu Pandamaran, Taman Sejati dan Bandar Botanic.

"Empat suspek termasuk seorang wanita ditahan di Pandamaran, manakala seorang lagi ditahan di Taman Sejati. Penahanan lima suspek itu yang berusia 18 hingga 53 tahun membawa kepada penemuan makmal memproses dadah di rumah teres mewah di Bandar Botanic," katanya pada sidang media, di sini, semalam.

Nilai rampasan RM450,000

Shamsul berkata, polis turut merampas 100 gram dadah jenis syabu, 3.85 kilogram minyak meth (syabu) serta peralatan makmal untuk memproses dadah dengan

nilai rampasan berjumlah RM110,000.

"Kita menjangkakan 1.5 kilogram syabu boleh dihasilkan dengan menggunakan minyak meth yang dirampas itu. Kami percaya dadah yang diproses itu untuk pasaran tempatan," katanya.

Polis menyita masing-masing sebuah Toyota Estima, Toyota Wish dan Toyota Vios serta empat bentuk cincin warna keuningan dan wang tunai berjumlah RM1,600. Nilai sitaan harta dianggarkan bernilai RM450,000.

Tiga suspek lelaki yang ditahan didapati positif dadah methamphetamine dan kes disiasat mengikut Seksyen 39B Akta Dadah Berbahaya 1952.

Dua suspek direman hingga hari ini, manakala reman tiga lagi suspek berakhir pada Jumaat ini.